

cu su 75 aniversario JULIANA SCHOOL esun mas bieu.....

Riba e prome dia di aña cu nos a caba di drenta a marca e di 75 aniversario di Juliana School, y cu esaki tambe e school mas bieu di Aruba. Na su director actual, su adjunto, alumnonan, y tambe na tur cu a logra nan enseñanza y estudio na e school aki ta bai nos mas sincero felicitacion. Un aniversario di gran valor y di gran historia pa cu nos dushi isla di Aruba. Nos sa cu na 1830 un pader bao di e nomber di Padre Serafin a cuminsa cu e promé school na Aruba, un school cu su dak di pal'imaishi y su murayanan di torto. Pero segun e aña nan tabata pasando y nos poblacion tambe a cuminsa crece, e necesidad pa mas school mester a bini. Y Juliana School cu pa basta aña tabata ser yamá den boca di pueblo como e School di Gobierno, y e tempo a bula y e xito ta numerable, y Juliana School a cumpli su 75 aña. Y pesey nos kier feliciteer na tur for di esnan di principio te cu esnan di actualidad, pasobra en realidad esaki ta algo grandi y di admiracion y ta un gran parti di e historia di nos dushi pida barranca Aruba.

nos entrevista cu su direteur



Sr. P.E. Croes

Mirando loke esaki ta nifica pa nos sociedad y considerando su valor importante pa loke ta nos historia mas informacion a ser busca for di e directeur Sr. P.E. Croes kende no a vacila pa concede nos tal entrevista. Caminda nos por a tira un vistazo den e notulen di e School for di su comienzo, algo masha interesante. Sr. Croes mes ta cabezan te di e school aki for di aña 1976, pero como maestro ya e tin 22 aña tras di lomba. No cabe duda cu awe e ta sinti su mes orgulloso di su labor hunto cu su adjunto señor P.B. Kock. Y asina tambe nos a yega na sa cu ta na Juliana School e prome alumnonan a yega na haya nan diploma di Mulo. Den nos combersacion nos ta corda tambe riba Sr. J.K. Zep Lampe, cu pa muchos y pa e historia di Juliana School tambe ta mara na su nomber. E Juliana School caminda e ta estableci actualmente tey for di 30 di April (Añi La Reina) di 1942. Y ta net na e anja aki tambe cu prinses Juliana a bishita Aruba pa prome biaha.


Naturalmente ta interesante pa

sa cua ta e prome alumnonan cu a ricibi e prome Mulo Diploma riba Aruba. Pa esaki nos a kita un tiki di su tempo valioso na trabao esta di Sr. Lydia van Romondt-Ponson, kende por a facilita gustosamente e nombrenan. Pero bo por imaginabo cu ya a pasa cincuenta aña cu un grupo di estudiante di Juliana School tabatin e honor di a ricibi e prome Mulo diplomanan cu a ser otorga na nan pa nan exitoso examen. Nan ta: Lydia van Romondt-Ponson
Erna Oehlers-Ponson
Ellen Croes - Raven
August (Tico) Kuiperi
Alfonso Mirep
Shirley Harms
Carol Leon
Ercilia Odor- Gonzales


Y asina nos por a brinda y feliciteer e grandeza di Juliana School su director y adjunto hunto cu esnan di tempo prome y esnan di e tempo di awor. Un biaha mas danki grandi pa cu e labor di enseñanza brinda na nos juventud, y nan nos ta spera di por sigi y gradua exitosamente mescos cu e promenan den historia di Aruba cu a ricibi Mulo Diploma riba Aruba y na Juliana School cu tin awor 75 aña tras di lomba y loke falta.

un di e prome- nan cua ricibi su MULO diploma

Na e momento cu nos a bishita su persona pa haya algun datos mas tocante e prome nan cu a ricibi e Mulo Diploma riba Aruba, y cu ta di Juliana School. Sra. Lydia a concede na nos un parti di su valioso tempo na nos. E mescos cu e otronan ya menciona semper lo sinti nan orgulloso di esaki. Y cu esaki tambe lo ta un estimulacion pa e alumnonan di awendia pa dedica cu seriedad di e valor di studia y logra mescos cu nan. Enseñanza ta un parti esencial y di gran valor, mas ainda den e tempo aki caminda e ta di gran utilidad, tanto pa nan como pa nos comunidad y nos dushi isla..



esun promé ↑ y esun di despues ↓



Sra. Lydia van Romondt-Ponson



*Pabien
Juliana School*